

LES GRACES DES POVRES SURVENUZ A LYON

SUR LE CHANT : « *Monsieur saint Ladre de Valoys* »

La gloyre à Dieu, grace à vous soit,
Lyon, de vostre aulmosne,
Nostre povreté y receoit
Refection tres bonne :
Sans vos mercys,
Hélas ! plus de sept mille
Fussent transis
De fain, parmy la ville.

Ce fu l'an mil cinq cens trente ung
Que de mainctes frontieres
A Lyon recouroit chascun.
En ces saisons trop chieres
Cinquante sols
Les bleds on veoit vendre,
Et les plus gros
Ne scavoyent où en prendre.

Messieurs de l'Eglise en accords
Avecques les notables,
N'y espargnerent leurs tresors :
Tant furent charitables
Que aulx bledz et grains
Eut si bonne police ;
A povres maincts
L'ordre fut fort propice.